




序

天下文章莫大於經
傳經傳者聖賢治世
之鉢也自脩己治人



魏月一
以至陳立宮府間者
巨而禮樂刑政微而
鍾釜豆籩俱秩然有
經燦然有緯於昭顯

爍罔非鴻文所敷賁
則文章事功原非兩
截迨後世文章盛而
事功少遂謂儒術寡

魏月二
效詩書之無益於家
國也則誣甚蓋學士
家罔實濟者良由侈
懷稽古不過帖括記

誦未嘗徹底澄源或
掇拾唾餘妄爲述作
一一皆燒相耳以是
服官如嬰兒入市顧

魏片三
瞻情况喪厥由來安
望其有所樹立哉若
我暄山吳夫子自做
秀才時所著四子講

義窺天人之奧抉性
命之宗濂洛以來傳
燈將晦至此重光故
其居位設施取諸素

魏序四
懷之豫殖理劇治繁
衷有成竹雖所際艱
危未能得志大行展
其夙負然兵農之際

所在都有成績炳炳
麟麟照耀遺書間者
可考而見也吾向有
浚濱語錄小學集註

魏月五
之業誠欲與當世之
士以實行相勗孰知
典型之不遠者夫子
已先獲我心矣使學

士家盡如夫子洞精
體要則文章自有實
用疇敢云經傳迂疎
無當於治畧也哉厥

魏月六
後校士吾鄉卽以本
諸已者迪人黜浮敦
雅務求經濟實學故
所徵拔皆碩彥大儒

今北方之士勲業爛
朕於政府者半出夫
子之門其遺教然也
予自敦牂謁夫子於

魏序
燕春風不能再覲遙
傳頹壞悲何可言每
念躬持絮酒雪涕棘
門而未逮也今冢胤

初於良月過吾里攜
夫子藏書與家季辨
若纂脩次第分爲二
集一集註疏一集詩

魏月八
文欲付梓爲夫子不
朽地然皆遺艸尙未
楷繕及入都以夫子
之狀請遂出其書以

相示予傷悼久之不
禁喟然曰茲集也誠
爲人子爲人弟者責
也予復何辭且多世

魏月九
兄與家季之能爲後
也甲乙俱有深意使
天下之讀講義者知
夫子之學爲有本讀

詩文者知夫子之學
爲有用本末兼該體
用一致善哉不愧師
傳矣遂欣爲之序

魏月九


峇

順治辛丑長至前一

日門下士栢鄉魏

喬介頓首謹書於

長安邸第



序

暄山吳夫子舊為畿

南直指埋輪折檻之

風震人聽聞嗣復督

學燕都自卿貳以迄
郡邑罔敢以請託干
職是為所識拔俱名
流寒畯其受知最深

時則有若李中堂魏
總憲諸昆者時則有
若少宰石少宰胡少
司農朱少司農陳者

時則有若大司馬梁
大司空傅大司寇高
大宗伯王者盡昔年
手植之梓楠今悉為

興朝之棟器揆厥偉材
未嘗不思其自也晉
以癭陶末學謬叨知
遇獲與諸君子共遊

其門猗歟盛哉追維
壬午之役蓋二十年
矣嗚呼歐陽子已往
而子瞻南豐之名噪

天下則天下之見子
瞻南豐不猶於見歐
陽子乎吾竊有憾焉
夫子以社稷之材值

三十四
洊亂之際賫志以沒
抑何悲也然所恃以
照人心目者有曩年
之著作在歷劫兵火

厥嗣初懷璧握珠寶
之弗失去冬負笈過
都崑林魏先生讀之
曰大哉師言其箕之

疇乎不勒諸簡後且
散逸使天下謂勝國
文獻弗彰於

昭代過將疇歸是余之

責也夫是余之責也

夫爰采其詩文有裨

家國者為一書綜其

註疏有補經傳者為

三序六
一書特未有以靡劂
也余適司計吳關世
兄來墅以夫子藁相
屬臨風展誦洋洋之瀨

瀨於詩歌則見其傍
徨感歎躑躅悲吟憂
君愛國之心藹然於
撫時觸物之下於奏

議則見其垂紳正笏
知無不言言無不盡
以治世之昌言為柱
石之危論一經創白

輒奮不顧身而從之
者誠以有所大不得
已於衷故勿惜也乃
若慕親如嬰弗衰於

婚宦居喪積毀不釋
於祥禫則於兩尊人
狀中見其孝思不匱
蓋如此乃若揚激清

流見賢良輒愛之慕
之遇節烈輒弔之傷
之則於傳記中見其
好善之誠出於天性

三序九
有如此乃若相規以
德而相勗以名芬郁
之善氣如挹我以蘭
芝巖冷之危詞如礪

人以金石則於僚友
姻黨往來酬答中見
其情之深也又如此
余所以反覆流涕而

不能已於懷也嗟乎
此固夫子之文章乎
實夫子在家在國立
身行己之實錄也雖

然猶經世書耳若四
子講義洞開性門使
往聖希夷微旨如旭
輪卓午先後迷津非

此弗濟倘讀其詩文
而不讀其註疏是猶
觀江淮之大而不知
其出於岷山桐栢涉

河漢之廣而不知其
發於崑崙崑嶠也魏
先生有憂之乃較定
二集使經濟經術各

有條理且可悟文章
性道實為一原大儒
之學當公之天下余
遂命工悉以鋟梓使

後茲者得以聞所未
聞豈特為表章一人
之私已哉

東省

康熙壬寅秋孟寧昌後
學王元晉頓首謹書

于澣墅公署



序

天下之業未有工而不傳
傳而不貴者亦有工而不
必傳傳而不必貴者更有
工而可傳傳而可貴而竟

不傳者雖然恒情每甘所
聞澹所見見古人一物則
玩之珍之不問工拙輒好
不能置以其傳焉耳傳斯
貴貴斯工與究論厥原凡

物多歷年所灑沉風雨排
宕兵火累劫不毀者其精
存也是以古人治一業必
先治其志氣志氣專一然
後新發於矧廢寢食忘晦

明窮造化之奇盡鬼神之
變業成未有不工工未有
不傳其所傳之物皆古人
精神之所憑故歷久而不
毀曷以有工而不傳也今

制藝家終年探索渺衆慮
以爲言引獨繭而抽緒簡
練揣摩亦云工矣卒之晨
耀其華夕已喪之無他理
不足以資其深氣先盡故

也至於泰豆之車公輸之
斤旭之筆秋之奕公孫之
劔神奇離合莫可端倪不
可謂之不工不可謂之不
傳也然而不必貴何者彼

其所爲重無當於家國大
無係於天下君子藝之乃
若所貴如董仲舒之王道
賈誼之治安陸贄之奏議
蘇軾之對策類皆事理詳

李序四
明實可施行非浮詞飾聽
者所能襲誠以之數人者
學術醇正才力亦復過人
慷慨發於情性激烈敷於
腎腸忠愛之私結紆不解

其於當年事勢社稷安危
早夜經營熟晰端委於胸
不得已而後言之故其言
在當日則爲廟謨石畫在
後世則爲玉律金科無意

求工而卒無弗傳傳無弗
貴也然天下豈無有奇抱
董賈識負陸蘇上無所建
明下無所交游窮愁著書
藏之名山莫爲之前莫爲

之後而沒世不彰者可勝
歎哉所謂可貴可傳而竟
不傳者也吾邑暄山先生
則有異先生誕姿絕穎兼
酣古學所著剩言註疏綜

理要徹性根入官後退佞
治兵累疏數萬言反覆利
害之情申辨興亡之故字
字所抒俱血痕淚點令人
讀之流涕詎非董賈齊軌

陸蘇後身耶我誦其詩而
深有得已在仕籍二十年
貴游酬餞之詞罕滓其墨
發爲歌吟非痛板蕩卽詠
孤忠傷物憂生三致意焉

山林之趣不忘窮老之謳
間作正如杜甫長饑陶潛
乞食古人襟次非世心可
測殆所云廊廟江湖爵祿
不入其胸者與尤健羨者

有象賢之胤爲之哀輯遺
編復有魏總憲王民部諸
公當世大賢以爲之徒相
與表章嘉德以聲施後世
是豈猶可貴可傳而竟不

傳者哉

時

康熙改元歲在元默攝提
格相月同邑後學李喬
松巖氏敬書於吳門之

香象菴



輯言

先君子著述頗富壁側間一床一架一筒一筐俱曩
年繕錄藏編所在林立不可勝紀不孝穉齡失怙罔
知什襲委墮於喪故者十之三竄失於兵燹者十之
五庚子先慈之變扃衡讀禮始痛追手澤殘瀋寥寥
僅可盈尺言念飄零百身莫贖

訪搜知故以暨叔昆間存遺札或手授詩文采之入
集喜過珠還所憾舊人凋謝落落晨星諮求罕備
集內有得之草創餘帙者句多點竄字畫壓疊不能

復識有得之楷書淨本者或蟲侵魚蝕剝落不完
孝寧闕母填不敢妄爲補綴以失當年面目正如斷
碑埋劒繡澀斑斕惟在

當世慧眼洞照於顏色之外而已

家昆嘉侯謂先君每繕一疏先澄心兀坐熟慮深維
非係君國得失民生休戚者未嘗輕率入告及疏拜
發後七日夜攝心凝志聚會精神在帝左右以祈感
格食不知味寢不交睫匪懼禍也茲集所載皆當年
肝膽其可傳寧獨在文章耶

先君服官後尚未舉子當寇變時王大父寄書署其
面曰盡忠報國慎勿以無子爲念每遇觸佞鋤奸輒
誦王父書數十過便志氣激昂身家不遑恤矣

一權相搆爲大獄羅織將興適天大雷雹邦人震恐
先君默坐小齋心語曰枉法沉寃天譴昭矣可乘此
出疏一挽回之至四鼓落草成天變示儆一疏疏入
後旨傳中外停刑獄遂寢其夕夢無數獄囚叩謝誠
異徵也

一僚友姻年報反私札多摘過規戒之辭語雖直諒

尚鐫而傳焉則其人之過久而彌彰佳文寧多闕也
不孝 敢擅刪之

年來收拾斷殘尚無倫次荷

崑林 辨若兩先生力爲表章始蔚然成編繼藉

王雪麓先生捐俸付梓庶幾不朽殆少陵所云文章有

神交有道者與 不孝 雖無環草之報敢忘犬馬之私

男初拭血謹識

餘廉堂集總目

卷一

雜言古詩

五言古詩

七言古詩

五言排律

七言排律

卷二

五言律詩

七言律詩

五言絕句

七言絕句

卷三

賦

序

記

論

策

卷四

疏

卷五

疏


議

卷六

啓

尺牘

卷七



雜著

卷八

引

傳

跋

狀

餘廉堂集總目

終

餘廉堂集卷一目錄

雜言古詩

秋夜雜言二首

有感

公無渡河

猛虎可刺

夜屬諫草三首

五言古詩

藥將軍

梵川

偶成

鵲巢

月出

水聲魚

兩翁

剪檜

哀水禽

暮江

曉江

夜發

曉雲

琉璃河

古風

夜雨

大兄坦如素嗜玄功贈以耽玄齋并漫吟一律

偶吟

詠月

春日同鄧秦鈺暨伯兄坦如季弟衷虛侄晉嘉謁

延陵君子廟二首 登大茅峰

七言古詩

醉後歌贈張侯二子 贈玄陽子遊茅峰

詠長松下梅花 澱山湖中作

移居懷竹窻 寒雨

聽魏生彈三絃子 利風

臥起 上巳

壽伯兄坦如六旬初度

五言排律

小許后 殘雪十韻

明日更補前韻

曉涼

夜雨六韻

小園梅花二十韻

明日始望月更佳而兼得酒

別石鼓

漉酒

月下

立秋日三首

七言排律

樹下

餘廉堂集卷一目錄終

餘廉堂集卷一

金壇吳履中暄山父著

栢鄉魏裔訥辨若 同邑後學李 喬訂

真定梁清標玉立 較 社

門人 栢鄉魏裔介崑林 男 初輯

寧晉王元晉雪麓 帖

雜言古詩

秋夜雜言二首

明星如椀秋空白 蟲響盈庭秋影積 我自秋深江島人

誰能夜半侯門客二頃無田一區有宅黃葉蛛絲幽萍
龜跡隣花半籬村醪一石燈火宵清烟霞曉色圖則山
形頌惟酒德何慮何營以詠以繹鳥飛滅跡蟬蛻生翼
乘彼白雲從吾所適

勾漏理藥彭澤仕杭京氏易姓劉伶酒名世人所重達
士良輕麋鹿有性鷗鳥忘情松泉和奏雲山雜屏竹封
千戶書擁百城擲鼈深江放鶴青冥吾素自得塵緇不
櫻可以長年可以養生安能惜惜人世中淵陵莫辨刀
錐爭

有感

鶴巢不取泥羣燕無相疑龍居避淺源非爲衆魚恩世
人喜怒太促迫曠宕自知畱不得明朝結茅向方山山
中猛虎無人跡

公無渡河

公無渡河室有美酒妾能高歌公之渡河身爲汙泥醜
亦不磨公竟渡河將如之何長天落月浩乎煙波小姑
與公親從公哭嗚嗚東隣與公怨相笑稱狂夫恩讐如
此亦可知公之渡河何其愚涉水則舟陸行車苟無其

具且安居公之渡河何其愚巨魚鋸齒腹咸虛湘纍恨
骨猶未枯彼爲忠義則已矣公之渡河何其愚公掉頭
目我愚我非愚愚者固以智爲愚

猛虎可刺

猛虎可刺不可弄鬚蛟龍可斬不可奪珠烈士可殺不
可毀汗堂空月明匣中龍鳴起坐慷慨提此安行鳳食
棟實猶嚇鴟鳶雖有讒猜不及清蟬要離猛烈劔不拭
血梁鴻清倫釜不因熱生則同肝死則同穴

夜屬諫草三首

帝座星絡索熒光爍幽冥嗟我心耿耿天門如未扃
三更猶未寢曉角尚無寐終夜自徬徨我生亦胡爲
夜如何其夜未央黑漫漫兮若無旦歧予望之旭日昇
將高臥矣徐宴衍

五言古詩

樂將軍

矯矯樂將軍奮義不擇地爲奴輒報主慷慨復何爲恩
節兩相貿藉口死知已死名與死恩千載無忠義青史
稱忠臣豫讓之報智國士遇則死衆人遇則棄委質已
無身塗人較酬施將軍人奴之衆人亦奚翅

楚川

蟬蛻遺樹根精響雲霄上野人住黃埃空激煙霞仰偶
然一尊酒林水晤清賞幽萍際樹綠山鳥隔籬響篠密

會真堂集 卷一 五言古 四
午才明楊疎秋更長
蹊分啼笑花禾合
東西灤斜日映
蕭條涼風動悲爽
悠然共會心
迨爾一鼓掌
安知習家
池足慰嵩高
高想客散鳥成羣
破月照歸漿

偶成

桑影入虛堂
斜陽亂明滅
山鳥鳴花間
聲轉如帛裂
瓶中
中幸有酒當此
不可失吾圖
卽時歡身後
無不歇

鵲巢

門前新鵲巢
大若六斗鬴
不見結構時
俯仰遽如許
前
年東南枝
初夏四雛乳
接哺爭出牖
跂跂鼓肉羽
比鄰

彼狡童孫升攫而去
責喻盡百方
幸以完相付
却有中
年兒麾我百錢募
腰雛上杪顛
膽碎不敢覷
卒克反其
巢
懽噪厥母
父出門每入門
翻飛迎下樹
似有感恩言
六口喳喳語
吾聞至仁世
卵殼不採取
德不格比隣
暴
虐乃及汝
常恐擇里智
棄我不復顧
茲見巢重新
安知
鵲非故當懋
慈仁化先時
戒童豎居停
勒扞揶庶免下
民侮

月出

月出藤蘿間
光染藤蘿色
照我虛窗低
盡作藤蘿碧
幽

人酣欲臥戀此壺未竭清景發孤吟酒盡重須益

水聲魚

吳門鬻魚人養魚盆盎裏上置一懸壺淙淙瀉流水借
問何爲爾緩彼須臾死命在想中待欲絕猶相繫妄以
江湖戀活活入刀几顧囊延饑兒梅林止渴士想在萬
法生想滅萬法已釋子用是觀可得無生理

兩翁

兩翁隔畦語下風常分明一翁耳半聾偏在上風耕因
其重叠問使我詳細聽自云筋力衰頗受子婦輕耰鉏

有德色溫清無柔聲前年喪老妻一室影與形東鄰有
寡媪擬取伴寒更頃聞北叟言淒斷難爲情叟言妾生
子欲舉舉不成家貧男各業不容更添丁豈無呱呱愛
判割圖家寧老夫因劊是向念消芽萌至今霜雪夜雙
骭冷如水語罷更歎息我亦一涕零上失道已久養老
政不行禽獸骨肉間安得天下平風俗苟不變自可殮
黃精

剪檜

庭前行十檜積歲仍繁亂乘寒一芟剪放出身強半丹

霄騰鳳尾蒼雲叱虬幹始有高風聞纔欲仰面看從此
百尺姿便佇摩青漢乃知凌霞意枝葉須斬斷

哀水禽

水禽宿湖淺欲避鴟狝騷頗以水自衛常謂世患遙一
夜早霜降凍合雙足膠天明飛不去百口聞呼號漁人
放篙至掇拾不用勞烹燂亦何數滿釜恣饑饕郊行偶
聞見太息坐長謠水居網罟深陸栖繒繳高奈何無妄
禍又及水陸交世路一嶮巖何處無薪刀何況生人身
亦欲自驅熬造物胡不仁獨事增鬱陶

暮江

寒霧塞空江山色暮乃見玲瓏耀西日紫翠堆南岸纖
蘿靜崖根綺花迴鏡面霜餘渺虛林煙裏斜行雁往來
帆總遲南北牽屢換經途十舍強出門一旬半風浪習
虞途淹留成佳翫

曉江

初陽上高峰纔照江北岸潮頭海外青帆額烟中綺豪
豨浴浪花輕鷗翔雪片渡江未有期且盡江南戀

夜發

會真堂集 卷一
孤舟宿江心得風中夜發蛟龍窟累過蝴蝶夢未絕但
聞聲颼颼不辨雨與雪忽然帆影轉放出半輪月

曉雲

白雲生曉谷層鬱煙霜漫輕明出林表荏苒及山半風
引向西移樹深畱遠看定有山中人朝朝自怡翫

琉璃河

龜鱗蒼石堤連橋亘三里參天百尺楊幽秀夾其趾中
有萬鳴蟬箏竽順哀耳山光漲石氣溪流草間駛

古風

莨莠初亂苗匪農無明眼禾秀實而俯傑然惡乃顯英
豪方肩鉅茗穎寧盡歛功成歸造物自下虛若埴無良
民不食晚節愈兇險嘉穀登倉箱莠兮早誅剪吾爲耕
田歌喟焉古冊簡

夜雨

夜雨晚來霽芳林雲日鮮喬枝落餘滴池面千紋圓和
風鼓柔莢徐若流水絃殘紅洗春剩積翠生夏妍崦嵫
能幾何清景仍留連

大兄坦如素嗜玄功贈以耽玄齋并漫吟一律

君嗜芳草綠兩峯彈玉琴豈惟丘中賞兼得清煩襟朝
從山口還出嶺聞清音了然雲霞氣照見天地心玄鶴
下微空翩翩舞松林收絃扣商聲又聽飛龍吟稍覺此
身妄漸知仙事深其刺鍊金鼎永矢放吾簪

偶吟

江上調玉琴一絃清一心冷冷七絃遍萬木澄幽陰能
使江月白又令江水深始知梧桐枝可以徽黃金

春日同鄧秦鈺暨伯兄坦如季弟衷虛侄晉嘉謁
延陵君子廟作二首

昔我古聞人棄國猶敝蕝明德惟馨香底脩洋人耳荆
蠻啓聖賢榛莽懷蔗芷悠悠古今情誰得謂君死
達人慊所性乃無軒冕情高踪照孤竹萬乘流雲輕冥
心至道側悠然想平生臧圯懷明哲曠志難爲賡

詠月

邗水向維揚一輪秋月光鏡圓珠溜徹弦滿箭波長沈
鈎搖兔影浮柱動丹芳延照相思夕千里共霑裳

登大茅峰

茅峰最高處俯視千崖壑冥目入空無馳情向寥廓明

月印池心白雲起山脚仙翁莫相訝吾已辭束縛

七言古詩

醉後歌贈張侯二子

客舍酒醒燭未滅鄰雞呶呶鬪鼠出歸夢凄寒不成寐
燭滅牀前見殘月都門病後背膝寒乞人絮袍裏不完
減產張郎夜相向長歌無捄柳瘦乾東門侯生亦酒徒
酒酣悲激拔劍呼奴隸盜賊寧爲儒斬頭不過創若孟
直須一馬取單于斷骨擬落黃雲渠中原已復不相惜
要遣絕域驚丈夫安能寂寂效此囊中螢乾死秋帷伴
經生

贈玄陽子遊茅山

脩水遙連彭蠡淨釣磯積雪千秋冷中有方瞳聃耳翁
服餌星華偶雲影紫琴綠杯終日攜烟朋霞侶相追隨
風秋海上如瓜棗露夜山中似鏡芝投環石上升仙秋
洗藥池邊居永劫相逢一笑一千年玄洲青島須臾歷
詠長松下梅花

長松百尺掃青冥澗底孤梅托淺陰冷艷高芬想同夢
長吟微笑總知心尼山夫子蹲龍質欲俯脩髯成拱揖
何人相對兩忘言莊周彷彿名温雪垞上老人骨凌雲

臨風微詠陰符文下有處子跪進履不知原是赤松羣
高陽醉客無徒侶亂踏荒村壓塵土偶然相值坐忘歸
橫林烟靄新蟾吐

澱山湖中作

澄湖停滿鏡光凝到底寒雲疊幾層我放歸舟漾輕碧
一尊閒倚白鷗清雲斷紅輪初碾地西灣十里金鱗沸
隔林霞綺襯蕭疎虛舫掩映生幽媚東涯平楚澹生烟
皎月團團出扣舷回看倒影浮槎底始覺孤遊星漢邊
水村夜纜魚標宿蝦渚鼉宮傍茅屋楓梢蘆節作霜聲

驚鴻嘹唳傷幽獨且喜明朝風日晴掛帆炙背姑蘇行
坐想高陽里中舊停杯遙待側冠生

移居懷竹窻

當初自住脩篁下便闕虛窻面瀟灑斜陽明滅白板扉
涼風搖動瑤籤架春深蛇跖蟬蛻生但求上番拂青冥
錦棚穉子歸鄰媪玉版禪師餉野僧宿露朝陽滴未已
濃綠淋漓透窻紙籜響初收漢帝冠粉香時節何郎媚
新陰巢鳥盡生雛紅翠交經織錦梭把酒北牖消永日
上書南國繫長哦霜欺雪壓饒姿態磊節虛中渾未改

得霧傲傲醉意真臨風嫋嫋回腰在如今失計他卜隣
頽籬淺草關荆門何時重過清陰里解帶銜杯對此君

寒雨

鳴雨五日勢未斷加以奔雷挾飛電三年旱魃始驅除
九夏屯膏終兀賤落塗雖苦急移牀迴燠還能寬搗練
打疎密樹插山尖脹破浮萍開水面蟄龍行地竹根長
沒馬深渦浪花轉老農當日憂壤裂太息非時枉天眷
寧知天事待人幹惟以有備成無患百日積乃一日用
三年正食九年羨君不見桔槔秋夏厄久枯長槽倒水

如重埏

聽魏生彈三絃子

箏絃已減琴絃半七絃不及三絃怨魏生本是雍門吟
指尖能語增淒斷愁嫁愁婚老向平每聞一轉不勝情
且將急盞追繁促莫學江州空淚零

利風

江豨吹浪東風急合抱長檣裊欲折篙工百手扼生蛟
雷掀浪攪誰能掣枝頭雨雹巢且墜足底風霆地恐裂
同舟喘汗秉燭坐醉客神全臥帖席平明五兩指前途

雲帆百尺初開折此時寧嫌風力勁昨夜顛狂又何疾
寸陰定可責千里經旬逗留收一捷迴看青山識未真
前追白鳥飛猶及宗慤長風世將嘯平生快意今蕭颯
也將樽酒擁紅鑪日暮開舲看微雪

卧起

敝裘尸寢驚日高晴光潑眼鳥鵲囂菖葉灘畔新雨漲
杏花枝上輕雲消危時心跡羸坦蕩少日著作藏焚燒

上巳

七旬春過無晴日纔見陽光苦蒸濕硯泫慵書被禊詩

池湮空負流觴節芳枝飄盡未見影黃鸞已老初調舌
壽伯兄坦如六句初度

華陽千古饒山水三峰列翠靈巖美我兄長嘯白雲窩
四壁圖書伴薜蘿奇篇宵映耽玄賞彩筆風生發浩歌
數奇欲上凌雲賦回首天衢難騁步玄亭空老一牀書
豹文自隱南山霧一時珠玉滿奚囊仙風遙羨來瑤島

五言排律

小許后

建始之際天變顯在王鳳而谷永等媚權著之
許氏許氏廢而二趙興王氏之黨成矣夫沙麓
之兆雞識其冠木門之謠燕啄其尾罪豈在后
哉雖其後以不道自敗始則非辜吾是以歎王
氏之巧于中而帝之明不能見其牀第也因取
后之二語綴而成詩以足其怨云

寢寢金屋晚蠭網上珠簾故劍凋家世新粧斷寵憐夜

殘悲月艷春晚怨花鮮風帳聲房曲陰苔色殿偏蛾魂
凝臘淚鸞血迸春絃綠草淒淒委玄宮渺渺懸史題斑
竹詠詩問白華篇雲屋瞻無地雷車聽自天綱維乖闇
闇骨肉隙纖纖子日符終殞妻雲夢不堅萌芽知禁約
根底失夤緣顯誠明廷嫁微疵永巷鐫黛朱銷蝕日裙
珥解留年娃館秋風落歡房夕露連君誠災變傲妾是
寵恩遷殿冷螢燈濕臺蕪兔跡纏鵲河當我遠蛤月照
人妍帳錦三年賦裝金五夜添堦墀藍玉砌壁帶綵珠
懸寧乏椒房侈都非營室占驪姬終有助鄭袖不無嫌
天上臨臺笑人間取酒錢誰能待媒介從此弛華鉛抱
恨餘輦帶陳情盡錦箋鴉啼桐葉露蟲緝杏花烟搖落
驚銀箭遲迴念玉鈿蒼龍真夢想赤鳳稍傳宣舊制防
難守新憐過易蠲奈何妾薄命端遇竟寧前

殘雪十韻

麗日晶晶曉微風習習春舞篁凋鳳尾蟠樹剝龍鱗砧
角徐刊璧簷聲急貫蟻香消花散地玉倒竹林人點點
慳松節絲絲學柳陰山光凝佛髻門軌化儒紳葉敗三
年巧花成四出新留巖青若繡漸沼碧無塵昨夜枚生

醉今朝車胤貧高人誰復辨行跡滅比隣

明日更補前韻

爲瑞猶前臘留瓊乃積旬一隈城似月幾處草如茵洗
粉梅粧靚迴青柳眼親鱗鱗松脫骨齒齒石消斲狼戾
藍田玉漂零蔥嶺銀睛巒多覆背曠谷或銜脣樹影留
仍曲籬叢落未勻徘徊穿履跡想像到門賓映讀憐餘
照思農惜剩珍梁園賦成後桂酒復誰陳

曉涼檢得前歲姑蘇詩有感

清旭滿喬林澄霞碎長堞涼颼忽相披爽氣暗已接去

秋八月中此身千山疊聽松漫和琴挂酒忘隨鍾濟勝
許椽情投轄陳遵俠相攜劔池邊未放金罍歇寺竹寒
山蟬阡花京兆蝶五湖霞襯船二丘雲沾屨鴟夷竟遠
遊荒跡空霸業山餘沼國眉濤濺懸門曉結愛已悠悠
抒情猶燁燁暝烟迷谷口落月洞林脅妙歌得終宵佳
樹延遠涉深然霞客言曾對靈山軟浪跡寄塵埃良札
埋殘篋徒著九華衣未解三歌鍊思友雲孤停感時淚
雙淡拳藤上竹花臥柳平波葉雲几抱書眠露徑濡衣
躡思尊明月舟送橘秋風帖自憐幽興孤未得曠懷愜

賣畚嵩山塗探奇滄海楫高風古無雙良策今徒挾安
得丹壑居母俟霜毛鉅三山倘可登短褐勞時攝

夜雨六韻

獨坐青燈燼荒村夜雨涼豹聲深巷犬人語敗垣螢
颯芙蓉浦蕭蕭薜荔牆愁中人欲老塵外酒初香優渥
堪堅稼塗泥好築場農夫始閒夜莫禁倒壺觴

明日始望月更佳而兼得酒

昨夜曩偏恥今宵月始團籬根猶火鏡林杪忽冰盤萬
里消雲點重宵湧雪瀾星辰韜欲盡烏鵲繞無端試眼
蠅頭細垂肩鶴髮溥面池皆碧落背壑亦琅玕欲喚三
人飲難禁千里嘆光披眸子炯藹覲面容歡相對宜侵
曉孤眠不耐寒嫦娥知有意留與滿輪看

小園梅花二十韻

何遜長吟逕林逋小隱村雪霜官路淨風日野塘暄綻
蘂寧禁笑垂枝先欲言容光花外潔朶數日中繁吳箔
珠千琲荀衣香一園握蘭聞則遠望雪卽之溫刻玉明
難似裁冰艷不存峽雲神女魄梁月謫仙魂髣髴求詩
句徘徊命酒樽築壇低處看招客放前論北影猶疎澗

南花已塞門幾宵愁猛雨逐日翫朝暎笛曲三聲怨宮
粧一點翻俗嫌薰柳氣幽分掩苔痕未得芳菲頌先懷
零落寃高樓憐翠獨深入羨蜂喧妄意銜杯夢真憂竊
藥奔溪寒參耿耿風緊月昏昏破粉啼空露分香別沼
鴛折枝應不惜留珮與王孫

別石鼓

春酒登山始秋風解纜期算來三度到吟得一篇詩高
葉生生落低雲死死垂江流吞郡去山勢捲崖來側壁
呀蒼洞疎藤點白榴湘魚多擁滕林鳥細哺雌舟楫皆
千里閭閻遍兩涯平蕪連楚色嶮句贈并兒昔日高歌
處今朝獨上時風烟越鳥怨指爪雪鴻遺疊鏐分晴巘
輕羅縐晚漪此生不重見能免別離悲

澆酒

積雨林臯葉先霜日夜黃不揀終日醉那免長年傷社
稷陸沉裏形骸殼中芒流離憫孩幼斬伐惜松篁今日
新蒨熟須臾宿感忘烟霞西爽豁庭宇北風涼返照開
幽徑稠萍合野塘杞繁大藥食桂發小山香待得重陽
日招要好客嘗

月下

積雨埋春盡新晴及月圓輕蕙萍上影稠笋竹根烟曠
朗星辰闕疎明草樹妍綺叢紅藥綻雪架木香纏庭宇
晝常閒風華露更鮮豹聲村犬斷柝響水禽連清景何
辭醉兵戈迫暮年

立秋日三首

按節涼風至煩襟乍欲醒蟪蛄十里韻楊柳一時零莫
爽披山骨晴烟墮鳥翎河流低壓樹籬落窄圍星避地
慚真隱悲秋感促齡何心念身世只有醉相仍

峰巒拔地峻禾黍被郊勻節序凋梧柳風塵暗棘榛採
薇倫紀業食橡雪霜身勉強親三雅張皇匿四隣長疎
歆憤客漸少入禪人天道何須問灰心契一真

蚊雷催早臥蝶夢續晨涼卯飲日常晷晝眠食或忘忽
然大暑過未覺小年長潦倒形骸縱衰疲性業荒幽蓮
秋水淨疎竹暮烟香蕭瑟神明斂剗心向法王

七言排律

樹下

薜門絕逕晝無喧
桐竹蕭疎風滿軒
緹樹碧蟲驚塵上
依人黃鳥坐枝言
開林已喜花當榻
塞戶猶防客入幃
重設釣磯遭雨沒
亂看詩卷任風翻
求之野事貧原足
已矣浮名醉莫論
俠士臨江惟酒債
高人休夏本山樊
奇巒壓屋雲千疊
涼鏡開園月一痕
曾劖龍珠知洞口
棟花無實欲高騫

餘廉堂集卷二目錄

五言律詩

暇日懷人

晚晴

蟬

江臯晚飲一首

與陳茂實楚川避暑五首

同建寺

仲春一日

冬日過天荒湖

和僧春城乞食

月夜

西樓殘日

雨花臺對客

龍山石壇

野飲

秋夜

行菜

立冬日城南曉望

詠柳

寒晴

夜歸

罷灌

題王野臣壁

晚

醉歸

白龍蕩晚泛

月蝕臘月望

步經南洲酒肆

鷓鴣樹

與孫元家攜酒東隣

春雪

春日閒題

暮雨

武昌立春

漁父

野場

天南

將歸

湘陰食縮項鱸

東阿問渡

明日

黃葉

暮

春深

初夏

晚晴

晴

初夏二首

晴夜

月夜

新晴

日暮獨行古墓下

花前

蟋蟀二首

新秋

暮晴

偶吟

黎陽署中別業

喜雪

七言律

秋壑

秋浦

秋深

失林主人

秋閨

夢京口諸山

懷舊

臘月十六日

秦淮席上聽妓

雲宿山房

下溟塘

對客遲沽不至

早西門

夏日

獨遊甘露寺

從鶴林至招隱二首

卧疾秋郊雜詠七首

響石

松江道中偶讀顧榮傳有懷張季鷹

新秋

喜雨

鄰鶴雪中來

過友人湖上草堂

雪竹

過舊居鄰里

華髮

晚郊遣悶

中書喬舍人五十

籬外

荒園偶題

雪

正月十二喜雪

春夜

夜歸

喜漲

樹下

水退

蚤起池上

涼夜

初歸

秋海棠花

阻風京口

放舟迴望

泊舟儀真江邊得一小菴菴主慧空自稱是沈蓮

池弟子

無爲州土橋晚泊

野驛

夜發

安慶道中

過湖

望衡山

發舟

長沙

湘水綠淨可憐與他江特

異旣過洞庭至岳州入大江黃碧混流十餘里
從此不復見矣詩以別之

沂河

兗州道中二首

流亡二首

范曄

馮淑妃

王僧虔

梁武帝

東昏侯

陳後主

庾公

魏孝武帝

符生

漢宣帝

黃鶯

聞鸚

竹下卽事

田舍

重陽

雨夜

惻惻

落花

月夜

日暮

月夜泛天湖偶成

爲孺孝賦白雁

丁卯奉使入蜀宿安山驛

懷華陽居士

登峩眉絕頂

贈孺孝先生湖上

巳卯夏謁邳州蘇念翁使

君信宿羊山寺有感

與友登覽勝臺

瞻孔碑弔始祖志感

和秦釘五十初度

坐土宮道房有感

登煙雨樓

謝王石鯨惠四太史刻兼

西蜀英多

壽陳鹿萍初度時長至

寒宵卽事

遣家屬之任

春二月按部鹿泉憂早兼值寇警題省院壁

秋大熟過鹿泉籌邊

五言絕句

秋蟲

輕雨

有情

曉望茅山積雪

茅峰看雪

月夜舟過銅馬泉三首

遊牛首山雜詠七首

銀杏

仙竈

塔影

辟支佛塔

凌雲臺

獻花巖絕頂

懶融洞

中夜作

同行

湘江絕句七首

壓酒

生菜

七言絕句

七夕七首

夜泊虎丘

晴夜

金山

丹陽道中

秋夜

曉行湖上

落梅花三首

初夏

夜行

寒露日於墓次見丹楓

撫州早發

衡水道中

永州留別同鄉諸子

山行絕句

江上絕句

九月朔日宿湖口

德州道中楊柳

曉雨

舟過清河開

山陰公主

褚淵

范曄

徐廣

魏宮

溧陽公主

石閔

費長房

宋公

秋日雨中見黃榴花一朶

園栗二絕

寒食

黃狸

青蒿帚

小樹

桂花二絕

金線柳

移梅

桃源步韻之作

華陽洞

秋日寇警赴關重經鹿泉不見壁間句有感

齋居祝雪

聞變誓死口占一絕

朝陽洞

餘廉堂集卷二目錄

終

餘廉堂集卷二

金壇吳履中暄山父著

栢鄉魏裔訥辨若

同邑後學李

喬訂

門人

真定梁清標玉立

較

社

栢鄉魏裔介崑林

男

初輯

寧晉王元晉雪麓

祐

五言律詩

暇日懷人

樹影茅亭午藤花竹巷連一枰嘲敵破五斗得吾全徑

改繁桃闌籬仍密
槿編燔魚待良覲
幽事定相憐

晚晴

雲碎收殘雨
山青刺暮天
餘暉桐葉底
纖月竹枝巔
草靄清蟲滿
花秋細蝶妍
涼風一斗酒
能使宿疴痊

蟬

何處藏輕翼
江頭獨有聲
如歌淒不轉
疑怨意原清
露白千山冷
風高萬樹鳴
秋來須擇葉
秋葉易飄零

江臯晚飲二首

酒席潮侵却頻移
入石叢雨銷千嶂
在霏卷一江空鶴

冢殘銘字鱸輪曠
釣篷誰知丘壑意
老大更飄蓬

尊罄沾仍得蹊危
度未窮風巖雲詭
謫月壑樹玲瓏
樵徑懸空翠
漁羣盪晚紅
誰能問幽意
山靄水聲中

與陳茂實梵川避暑五首

林塘風百畝
休夏著幽人
曲檻平波面
虛窻見樹身
看雲登隴數
隨身出蘿頻
好賣嶠陽宅
攜家此結隣

白日樹陰昏
殘鶯交近村
鑿圓憐啄木
關僻弛應門
屋滿棲禽汗
堦餘臥鹿溫
閱休吾愧爾
爾得往山樊

烟竈燒殤竹
風門構老藤
幽池醉山簡
朗月對孫登
遠

落諸峰磬孤懸一室燈夜深花影合清露濕層層
孤巘屏門秀廻溪帶樹流斜陽明鷺腹懸雨過人頭終
夜論心媿經年爲食謀無田真藉口薇蕨待何求
廢窰通晚望層逋出林巔雜塢蟬聲裏遙山鳥影邊逢
迎循澗石笑語並池蓮更有相期醉秋深叢桂前

同建寺

雲白秋林淨花紅野寺幽偶因雙樹好遂果一帆遊酒
態消元亮詩情起惠休臨池分午供鳴磬下鳧鷗

仲春一日

烟波空墅面花草塞城虛柳色藏啼鳥梅陰度泳魚山
期三歲曠酒負半春餘薜荔閒齋滿清芬讀素書

冬日過天荒湖

繞湖行十里湖碧染空明不辨陰晴色惟知日月清踏
沙棲雁跡敲竹罟魚聲隔浦聞樵唱慙慙勸濯纓

和僧春城乞食

稿坐知春至東風頂雪除物歡年稔後天假日中初雨
淨龍歸鉢烟高施身廬飽來何所得幢影日壇虛

會真堂集 卷二 五言律 三
虛窻明月孤林影亂啼鳥絕壑千椽露寒城一曲蕪抱
愁臨短劔挾意測脩書坐使年華晚風霜了碧梧

西樓殘日

西樓吞暝色萬木和烟深松鼠啼清靄山禽坐醉人風
篁全入枕霜樹半欹隣好待團團月南窻空石鱗池名

雨花臺對客

日沒長江細風生遠壑盈荒臺臨落木旅舍聚漂萍野
葉隨時染孤鴻著意鳴數峰烟霧合相對不勝情

龍山石壇

築石凌烟草松花覆黯然長吟黃葉墮醉臥白雲圓高
幹論須細清香聽未全葛洪如可約共此度殘年

野飲

把酒空原晚風生日脚黃禽歌繁欲闕柳氣苑初香水
面花鈿淨林腰蔓帶芳蘄蘄麥秀影微送席間涼

秋夜

蟋蟀噫盈砌瞿瞿良士身金風聲鶴唳弦月射魚鱗甘
瓠全除故香秔漸食新東隣柿葉落愁殺長年人

行菜

會真堂集 卷二 四
霖霖重陽雨新晴好趁耕全收見秋稼半飯仰冬青暮
灌穿雲汲朝看涉露行隣池容借潤覆塊日青青

立冬日城南曉望

川晴烟皓澹林煖鳥喧呼楓簇殷鮮錦榴垂窰窰珠蒼
藤連睥睨橫霧斷浮屠迢遞青山色招要綠酒壺

詠柳

燕丹古道上楊柳最夭喬旭日含烟影微風拂露梢帶
蟬秋嘒嘒繫馬暮蕭蕭一被離人折飄揚不自聊

寒晴

日光猶出地雲脚剪西風雪凍林顛白霞烘廟背紅賣
薪恒市上枕麴必村中暝色秋迴好寒晴更不同

夜歸

每出東城晚斜陽頰寺扉春流風不定暮樹靄相依麥
浪翻初密溪星踏尚稀却因隣犬吠童子識宵歸

罷灌

西嶺雲雷鬱羸夫罷灌畦豈無機械事猶覲渺冥施龍
過風屯塢蟬臨月影枝蕭然復何較得酒已忘疲

題王野臣壁

會真堂集 卷二 五言律 五
密桂留冬燠南榮稱醉眠
鑪栖菱殼火簷呷荻花天
疊嶽凝寒翠疎林映晚烟
此間堪卜築安得買隣錢

晚

遙山收積雨暮靄入空軒
花底游魚沒篁梢栖雀喧
漁舟聲泊岸樵笠影過樊
惻惻幽居意浸浸到酒樽

醉歸

草逕細無岐醉中猶識歸
青山披霧見黃葉出林飛
歲熟寬杯酒天寒急褐衣
鄉鄰多美醞莫遣往來稀

白龍蕩晚泛

澄潭面空霽一葉點汪洋
衰柳遙山影寒蘆積水光
罾罨綺練村塢裏朱黃誰
和滄浪曲漁歌紫蓼旁

月蝕臘月望

向背磨雙鏡張弛拓半絃
如何資大地時復碍高天星
彩晴初似霜空雪後偏不勝
更也仰坐絕竹鑪烟

步經南州酒肆

當年家澤畔沽酒幾迴過
白浪開窻遠斜陽晒網多
經過識樵牧遷徙憶藤蘿
繫艇悠悠客長眠未脫蓑

鷗楓樹

會真堂集 卷二
池上鷓鴣樹春光顛倒來葉紅先放杏子白後開梅的
樂明窻牖殷鮮覆雨苔怪他騷客句重疊未能裁

與孫元家攜酒東鄰

攜手松蹊黑篝燈甕牖明開門淨掃地沽酒遞傾瓶歲
事虞衣食交情話死生荆薪無用代霜月已高昇

春雪

春雪不爲瑞夜寒徒自遙籬篁都壓倒庭檜獨增高帶
港封漁艇尋門入鵲巢跡須辨來往豈厭送香醪

春日閒題

伐木枕頭邊幽人妨曉眠軒窻下晴日溪閣散朝烟束
手頭梳後拈書病酒前兒童開學苦似我懶求仙

暮雨

逆浪迎風軟欹帆著雨寒山昏青髻隱江滿白花盤漂
泊抽思苦淹留罄甌酸鄰舟已先旋仗爾宿幽潭

武昌立春

天南風物蚤客裏景辰輕節已迎來歲人猶趨去程梅
飛岡北院柳暗郡西營遙想鄉園菜春盤尚薦冰

漁父

石罅舟如蚌槎頭舍似蝸赤璜來上釣白鷺與分家換
酒於焉足謀生有底涯桃源應到慣洞口足飛花

野塢

野塢峰巒合人家籬落香水龍花委澗山虎葉登牆阡
陌鳴春雨牛羊散夕陽清明纔幾日處處競拋秧

天南

氣候天南異寒暄頃刻更淺冬朝雨過深夏午山晴裘
葛相連接衾裯屢減增何方防疾病只有醉騰騰

將歸

酒次燈花發歸期此路真束書開已數解纜誤堪頻就
岸題斑竹沿江採白蘋還舟多樂事只問挂帆晨

湘陰食縮項鱖

名識襄陽句腴嘗湘水陰銀刀爭膩理鱖玉版敵肥脣
鱖蝦菜忘歸久鱸尊發興新偶然沽俊味不復恨迷津

東阿問渡

水壅餘波溢橋崩峻趾留鷺飛移近渚馬涉飲中流黃
里煙霞古東阿樹石秋

明日

月上不可待，盃乾誰復供。
星芒閃疎竹，露氣咽寒蟲。
交態俄移代，家規夙事農。
鹿門高潔意，遺後正容容。

黃葉

黃葉連村下，陰雲掠地飛。
風枝鳥未定，霜渚雁何依。
薄酒能賒足，枯缸任燼微。
家家荷擔立，稍望羽書稀。

暮

墟落寒烟起，林塘夕炤虛。
無聲鳥定久，著色樹凋初。
獲寡場先畢，霜遲架未除。
太平祈賽社，長與鼓鼙疎。

春深

杞蔓宜爲架，篁殘欲著籬。
衰疲慵過日，災亂忍需時。
深痛嘗摧骨，長貧久去皮。
芳春能幾日，花莢滿清池。

初夏

宿雨川原淨，新晴草樹香。
荒園惟趁夏，積翠自生涼。
鶯侶金梭亂，蟬聲綠綺長。
靈龜藏六處，重棘繞幽篁。

晚晴

積雨猶澌瓦，斜陽已滿林。
殘紅綴枝少，春漲綠池深。
羣雀梳翎曝，雙鶯試舌吟。
翠簾絲柳外，看掛一鈎銀。

晴

花點殘春徑鳩聲晚霽天烟巒透山骨黃綠鬱林顛策杖沿籬步攜編就榻眠自餘無一事巾褐待終焉

初夏二首

烟日林光漲嬌鶯不住啼藤花蒙雜樹麥浪入平溪松響荒墳畔篁陰古寺西日長徐步處彷彿有蟬嘶
縹綠藏三徑新篁插幾竿孤居僧夏寂小飲麥秋寒只有鶯歌切能驚蝶夢殘紅萍定何意密密覆清瀾

晴夜

已過立夏節半壁適當頭林樹無枝抗空雲絕點浮竹

殘憐筍少杏老厭陰稠移席茅簷外清光幸可留

月夜

弦月曬初晴星浮雲自明濃陰當戶積暴漲與屏平螢弄沿堤影魚喧上水聲開軒迷野眺籬外夜烟生

新晴

霖雨知秋稔新晴得夜涼波聲吹泛鳥林滴濕斜陽風竹參差久露螢開閣忙此時消一斗羞澁久空囊

日暮獨行古墓下

暮靄蟬千樹烟波鷺一溪霞澄綺欲碎山霽翠猶迷偶

出荒籬外因過古墓西百年人在否晚景有詩題

花前

東南鬱雷雨西日洞林明窈冥疎光裏荒幽非世情蟬
嘶松徑黑燕剪稻畦青偶得花前酒涼風澆砌生

蟋蟀二首

蟋蟀入牀下逼人嗟太深悲懽定何意絲竹自然音
婦聽之泣羈臣嘆復吟枉將千古恨漸染到無心

俟秋疑有智入夜憫長劬滿腹悲團扇衝喉出貫珠驚
寒緩促織弔月急啼蛄兒女喃喃意琵琶訴得無

新秋

客壘猶營燕商音欲變蟬森森立露竹颯颯委風蓮禁
足俄三夏藏頭更幾年庭梧強知候一葉擲朝烟

暮晴

火雲秋色淺凍雨晚晴涼水鳥潛喧岸風螢亂入牆月
澄疎樹隙露裊暗花香道路醉鄉遠懨懨愁夜長

偶吟

入院高荷蚤臨尊菡萏遲絳房扶水萼翠蓋倚風枝檻
坐明星席窻過驟雨時流螢點點度故傍綠陰池

黎陽署中別業

省院臨河朔西偏一徑通孤松俯羣卉叢竹壓高墉深
靚人誼隔幽蕭山寺同一聲輕破寂木葉下寒空

喜雪

映書疑是雪起視故霏霏玉抱槐枝瘦脂生栢葉肥雙
尖將沒馬九斛已盈扉一白應宜麥刈溪興欲飛

七言律詩

秋壑

秋壑寥寥秋色微隔城秋樹戴秋暉雲飛野水邀僧渡
雨挂空山催客歸丹熟劉安風發桂賦成鮑照露凋葵
壺中沽酒揮觴盡靜看蛛絲落紫薇

秋浦

寥寥秋浦樹微曛漠漠荒城雲對屯桃子壓簷多似葉
楊枝臨壑少於根空林拾果隨山鶴香石摩苔俟野髡
溪上露臺收釣去月高魚動水波渾

秋深

晴溪溪影上林梢閒臥軒窗反反騷風落日庭寒雀散
日留花籞晚蟲跳張儀病後猶存舌潘岳秋深有二毛
斯世縱難容儻宕獨無幽意向漁樵

失林主人

可憐紅樹逐秋深試買蒲帆逗晚林正遇焦家傾甕綠
且隨陶令掇籬金遙山自發烟霞色隔圃交加蘿桂陰
不以盤餐掩脩竹子猷從此數相尋

秋閨

蓮帳輕懸一榻烟薰香深夜悅孤眠螢辭曉閣燈濡露
雁繫秋書字滿天短照易殘如夢暗微情難掇似絲連
紅蕖開了駉駉白剩有芳心向暮年

夢京口諸山

空庭槎枿雪霜清歷落羣峰入夢青白鳥猶依鱸釣石
蒼苔自榻鶴碑銘月明茂苑臨江見雨響蕪城隔郡聽
一斗酣歌消俗慮十年雅故屬山靈

懷舊

謝公把酒舊山林憶共清樽細月陰雪漲江湖浮地肺

會鳳堂集 卷二
夜寒星斗簇天心溪流靜枕侵琴細意氣高歌屬蓋深
索處又驚年歲晚滿枝霜露落高岑

臘月十六

隔春七日蝴蝶飛草心柳眼春依稀臨風未試酒湛溢
乘月且看梅芳菲懷人千里共旅食學宦十年仍布衣
南方顧生竟衰老唾壺擊破更嗑唏

秦淮席上聽妓

秦淮到底白雲天送客將歸錦瑟筵山影拖烟過繡隙
潮痕依月上沙尖柳枝柳下求詩帶桃葉桃邊渡酒船

更請琵琶歌一曲滿空風露落水絃

雲宿山房

萬壑千林莽戶簷數竿脩竹亦翛然江天稍隔疎籬外
澗響皆環曲址邊蕭寺杉松參佛過茂林烟雨著書眠
青山不用巢由買好借幽深寄暮年

下溷塘

几杖崔巍戚屬尊銅鹽狼戾虎豺屯少年已負東南兆
白首空成西北奔十里風楊嘶馬過半塘烟草暝禽喧
千秋大業仍誅錯成敗悠悠未易論

對客遲沽不至

莫怪文饒沽酒遲蒼頭能飲是吾師却愁還市能翻瓮
誰念看山空把卮野曠霜威寒謾謾閒庭日影下欹欹
應知易得尊罍恥待向幽林月色時

早西門

橫巒赤葉出層城徙倚江郊雁數聲日落帆幃何處集
天清砧杵幾家鳴淒涼生事從誰盡荏苒年華祇自驚
少婦壚頭堪醉臥相逢未識阮先生

夏日

長林莽莽夏陶陶凍飲何人共捉糟今古真成一丘貉
賢愚何啻九牛毛庭晞法露榴紅燥石倚閒雲竹翠膏
世事無端幽事好且將深艷註離騷

獨遊甘露寺

蜿蜒蒼龍脫脊來大江浩渺爲南迴珠宮日靜龜鼉影
鐵塔秋深鶴鶴哀難按畫圖尋米墅好求榜額作蕭齋
山頭片石猶堪語未負生平獨往懷

從鶴林至招隱二首

晴巒含暝綠淋漓添助幽深夏木時白鶴不歸開士座

黃鸝仍囀逸人枝酒邊蜂影虛無轉屐底松濤顛倒吹
曲曲鳴泉自山路向來虛問牧羊兒

岩岩古寺捧烟叢裊裊風枝隔暮鐘櫻熟鳥窺籬影外
草平人坐水聲中溪光帶樹分衣翠林彩成霞入蓋紅
此地結茅堪穩坐往來那得子光同

臥疾秋郊雜詠七首

深秋深夜深林裏獨抱幽情慰瑟居霜滿青苔留鹿蹟
月明紅葉透蟲書故人供秫容寬釀僧舍分畦得自鉏
元有高陽舊徒侶不妨冰雪過三餘

平原獲稻水雲悠啞啞輕鳥逐晚耰楓葉漉霞明酒幟
蘆花捲雪擁漁舟風烟大澤天寒集鳥雀空村日暮愁
羨殺醉樵眠社櫟直將無夢勝莊周

一病心灰臥遠郊翻嫌忙事靜中饒殘日打魚催晒網
他村餉酒促還瓢老氏祇增嵇叟嬾儒書裁憶魯人臯
昨夜水南看鬪犢欲將勝負問時豪

戶戶烟籬豆蔻枝村村新釀菊花脂天寒黃扈初供職
雨煖蝦蟆暫爲私比社禮神歌些只對門迎婦著乎而
太平何用長貧賦贏得閒身伴酒卮

一從瓠落散朋儻閉戶惟來幽鳥看硯沼林枝風影濕
藥鑪霜葉火聲乾西山霽爽爭秋峻北渚烟波動暮寒
欲寄魚書問同社只今誰得道平安

喬林未暮月纖纖亂水平蕪隔一簾別浦漁歌連靄起
斷橋鬼火對霜燿將因疎僻成高蹈得傍蕭條且久淹
四十生涯惟爛醉誰能拘束受時箝

衰柳牽風掛遠堤江蓼對影臥平池軒墀晚入漁樵艇
籬落寒勻霜雪枝欲見故人惟野鳥但判醉處是愁時
近聞南塢多脩竹好就琅玕寫楚詞

響石

石路春風幾度行每從烟靄覓鏗鉤虛中似荅敲詩響
流韻真供漱齒清竹杖偶過聞地籟芒鞋徐踏節泉聲
固知魚釜萊蕪令欲作華鐘寶磬聞

松江道中偶讀顧榮傳有懷張季鷹

張顧交親世絕倫每於淡宕見情深生前疾病憐耽酒
死後風流憶鼓琴江水自清餐蕨處溪烟不見採菰人
荒雞嘹唳寒空晚掩卷長吟一酒襟

新秋

柴門新霽得新涼雙燕斜飛掠稻香獨酌醉時蟬嘒嘒
遠村迷處靄蒼蒼園荒竹節都埋草水漲荷花不滿塘
惟有紅薇開未歇芳菲應伴九秋長

喜雨

三徑纔深松竹陰四鄰乍絕桔槔音市平米價無憂飯
林落風枝大得薪溢海只驚車軸藏沃臺空費勺升勤
懸知麴蘖今年了倒甕呼兒盡出陳

鄰鶴雪中來

王恭裘氅簇寒暉踏盡冰蕪到竹扉石徑苔痕高士履
天壇月色羽人衣質迷銀氣呼方見袖惹瓊花舞不歸
但是袁安門外跡縱橫彌覺往來稀

過友人湖上草堂

爲憶茆堂訪舊踪霜筠雪栢浪花東三家漁戶埋殷葉
萬里鷗羣沒碧空後閣聞聲識雛鳳壞牆留跡記飛鴻
遊虛可似庖丁刃十九年來一夢中

雪竹

珠璣稍稍散琅玕楮葉琪花已作團君子一營俱化鶴
仙人三島徧棲鸞密妨身道侵簷急疎放山光入座寒

會待剡溪明月夜開牕還共此君看

過舊居鄰里

浮屠桑下還三宿况我於焉歷哭歌輕去定緣家具少
重來還喜故人多西鄰牛稅逋應久東道雞觴喚卽過
个个摩挲舊脩竹相逢無夢奈君何

華髮

華髮灰心嗜慾枯此身一點白雲孤鶴須有祿休招養
魚本無名莫強呼笋發杜林深掩徑花開卞墓迫攜壺
經旬不遣城中信臘酒盈瓶未用沾

晚郊遣悶

鏐鏐西峰噴紫嵐夕陽金碧碎幽潭醉依風樹和身動
俯眺霜原恣眼寬鄰逕苔連僧寺杳長河楓照賈帆寒
等閒何必驚非意胸有秋星不可干

中書喬舍人五十

年少詞場立赤標便承華胄緒遙遙三賢品更推龍首
九禁人來索鳳毛西掖絲綸仍世業東山勳烈竚時髦
知非定笑蘧生晚盛德高名已四朝

籬外

會真堂集 卷二
葉紫花黃籬一層不遮雲白遮山青雄蜂穴樹閒留看
啄木敲林靜倚聽只欲放聲賡牧唱可知生事在魚罾
若非暮靄朝烟好孤殺山樊獨鼈生

荒園偶題

籬落風烟絕四隣可憐蕭瑟似幽深重巢乳鵲喧隨客
古墓潛狸走突人醉路每忘橋過未煖牕惟覺夢來頻
衣糧不問專催釀彼養形骸此養神

雪

電陣鏗鉤鬪玉龍襍襪鱗甲橫盤空助留日月燈光外

摹畫乾坤粉本中低舞千家停楚曲平行萬里逐胡風
可憐鹽絮兒童語千古相傳誰最雄

正月十二日喜雪

連纖不已忽交加壓竹摧松亦任他入水未隨波汨沒
沾林先上樹枒杈寧消杯裏仍爲酒莫向梅邊更作花
入地遺蝗應百尺千箱麴蘖報田家

春夜

開軒晴夜水淪漣篁檜清陰合檻前殘雪只留林北面
繁星都在月東邊碁爭死地深宵劫燹取生枝滿竈烟

客去不愁無伴侶倚風梅蕊正嫣然

夜歸

半醉由城赴野田城頭鼓角已喧天人行烟月琉璃裏
身宿林星燈燭前歸卧只貪晨夢穩愁吟不稱早梅妍
漁竿雉翳皆生計自笑頻頻入市廛

喜漲

一夕鳴霖暴漲生瀾漪欲與板扉平莊周儵鯉心同樂
杜甫鸕鷀眼共明劔拔節間塔下笋藥丸聲裏樹頭鶯

杜詩丸藥
流鶯囀

兩岐且喜無妨害峭崿西山已暮晴

樹下

雜木差池未暇誅澄澄二徑綠全鋪招來異鳥鸞兼鳳
吞吐清風瑟與竽戶映棗花潘苑夏盤遺蒜梗閔厨晡
不須愁到黃昏候新月沉鈎酒滿壺

水退

汲引潢汙出草堂產蛙那復辨池塘洗泥葉面扶荷起
鑿溜根間恐樹傷上水輕儵多淺得劇乾羣鷺故高翔
東菑沒盡仍稱快女魃裁驅向北方

蚤起池上

三度開牕天未明曉涼端傍獨眠生魚吞清露羣浮鼻
翠背香荷遠曳聲草合醉迷村徑轉月明貪臥石橋平
休嫌頭白仍無賴老馬爲駒雜復能

涼夜

連朝陰雨開還合不到涼生未肯休多病只愁留剩暑
無衣又怯入深秋天高星彩晴來小風順更聲夢裏稠
啾盡沽來一升酒任他蟲語亂啾啾

初歸

毘陵夜飲酒猶酣日出輕舟到草菴僻塢早霜飛赭紫

小塘秋漲發青藍暫離穿榻還相憶夢著浮名亦可慙
休倚癡頑逐年少鏡中試看雪氈氈

秋海棠花

苧蘿女兒十二三幽艷天然辭粉丹袖垂鴛翼朱紋錦
珮結香球蜜色檀月隔桂陰蟲瑟瑟苔連竹繡露溥溥
丰標不擬春宮醉趙后楊妃菊與蘭

將之衡陽阻風京口

澌澀寒江紫霧生初陽纔照半帆明
龍鼉影入銀山寺鷗鷺羣低瓜步城
歲暮獨愁寒景迫身閒頗覺遠遊輕

跛途不進平生慣且酌雲疊細細傾

放舟廻望

阻滯方欣一旦開流行又悵隔年廻故鄉山色自崖返
飛蓋潮頭駕日來誰復計程思遠客只宜隨處對深杯
鄉園梅蘂無人詠月後風前獨自開

泊舟儀真江邊得一小菴菴主慧空自稱是沈蓮

池弟子

道傍小寺向江開中有閒僧絕世埃相問似憐行客苦
自言曾見作家來猫兒帶索防傷鳥棘子編籬爲養苔

始信塵中多淨土斜陽欲去幾徘徊

無爲州土橋晚泊

千里行舟未擬還每逢淹泊一躋攀潮紋蹙入三家港
日脚分垂兩岸山鷓路風波行棘澁龍渦星斗宿潺湲
欲依商舸成隣里萍聚天涯總不關

野驛

十日淹留一日行難將促景計遙程翳村霜柳枝枝直
度嶺烟鴻字字橫萬里波光煎落日半江山影壓寒星
旗亭坎坎聞更鼓閒向舟人問驛名

夜發

颯颯船頭風雨聲臥知今日掛帆行久淹只恨前途杳
遠去真拋故國輕棲雁盡隨飛雁起村鷄時應客鷄鳴
不須更說飄零苦行止徘徊白髮生

安慶道中

鷄鳴催得蚤潮迴凍枕霜帆扎扎開渚雁有程催客去
海鷗無伴逐舟來晴山明白都如月遠樹依微只似苔
拋却故園還憶否江城初見一枝梅

過湖

湖心三宿纜魚標始放飛帆帖紫霄天外餘波吞七澤
洞中歸路達三茅萋萋芳草湘洲近片片征鴻岳影遙
此去因人那得住釣船吹笛若相招

望衡山

五帝周班長祝融氛氲森竦與天通長江曲曲收千里
斷岸時時出數峰斜吐岫雲雙笏白倒飛海日匹綃紅
層崖未得攀蘿上神氣靈光決眚中

發舟

湘潭已過便長行量酒開書好計程百里連峰秋綠淨

半江斜日晚黃生
炊烟自擁商帆過
樹影偏依釣石成
不是客愁須把酒
眼邊消得二三升

長沙

重霧濃巒漫渺茫
古稱卑濕水煙邦
郡中灌木多干郭
城上虛樓悉面江
帶影蒼禽盤嶺角
趨魚白鳥拂船窻
賈生無限投書恨
却得空山祠廟雙

湘水綠淨可憐與他江
特異旣過洞庭至岳州入
大江黃碧混流十餘里
從此不復見矣詩以別
之

曾送歸舟千里長
輕漪重綠發秋光
嬋娟深染斑筠色
杳靄濃浮杜若香
孤客有吟常乞與
窮途無悶不分將
如何嘿嘿悠悠去
腸斷情人過岳陽

泝河

牲玉曾悲瓠子吟
使槎秋寄歷星辰
鼓行疾據吞淮勢
磬拆徐迴入海身
日下帆陰渾在地
月中浪影暗生金
田廬兩岸爭跬步
正賴清時河伯仁

兗州道中二首

緣空石路轉陂平
脫葉蕭蕭撲去程
落日中原開醉眼

秋風下澤繫離情山粘雲影移時過溪擦砂痕入夜鳴
旅雁背人南去盡霜前無復一聲聲

平原萬里漫風烟問舊時時一愴然橫海雲寒秋戍外
遶天山缺夕陽邊誰將形勝供疎覽自分蕭條送暮年
此去客途何日了一樽逢着與纏綿

流亡二首

本逐流民作流賊更緣流賊致民流鳳凰食貴長塗餒
飢人有以一文市蝗羹一杯而不得者熠燿居空故未留野老只知蠶穀
詠廷臣休唱繭絲謀如何賈傅傷時涕翻使丹宸獨自

流

螿妖入穴更猖狂盪沃何由舉鑊湯蟣蝨又生新甲冑
虎狼還矚破城隍未施充國諸長策安得黃巢一暫降
所恃一人薪膽志精誠如日滅天狼

范曄

陳志清裁更剪磨一行鋒銳雋腴多書成小版羊欣法
絃動纔終宋帝歌博進可堪拋七尺淚珠空欲向雙蛾
最憐誤死天文客更厯餘思慮室戈

馮淑妃

會真堂集 卷二
三
褒女傾城詎本期未如特詔撤衝梯翫殘粉鏡臨戎急
著罷翬衣避敵遲鸞鷲永爲羣雀匹泥塗裁與九霄辭
綠珠未死君何恨心絕琵琶絃斷時

王僧虔

一家天下一家移迎者歡呼送涕洟視蒜自能開草肅
削查誰忍見元徽夷齊蠟鳳名何惜舜禹羶羊事可知
興廢從來皆有意依然謝瀹一枰棋

梁武帝

金版出時紆地痛玉旄指處洗天腥黃星天子方千曆

白馬尚書甫七齡頗覺領軍貂珥重不知公主雉謀輕
冤家須信生來早召亂無端是太平

東昏侯

羽鎧連鞍翠寄生急來結束得寧馨風流只擬誇尼子
神力還須仗蔣兄猛士焚時休突陣女兒臥處尚吹笙
乾坤惟在蕭家轉未負辛勤老射棚

陳後主

觴翰悠悠處敗亡矯他祖業太倉皇降書自取投東井
急報原封在下牀未解楫迎桃葉苦頗嫌城遶橘枝黃

會鳳堂集 卷二
生平承聖梁行暮又向關中見後梁

庾公

資格聲階際罕雙一籌蹉跌便奔亡竹頭齷齪那堪效
薤白逢迎亦可傷小舅只能行毒酒彌甥幾不賴椒房

謂穆帝

若非讓表慙慙在早見生金墓碣黃

魏孝武帝

羣星一夜北飛催南帝何勞跣下堦鶴始來巢昭駕出
龍終居井魏圖乖黃河東注爭奔淚明月西流悵入懷
可惜鬼工縫玉盒也隨椒寢棄天涯

符生

五眼三羊一淚兒慈祥邁世古來稀直愁行水星辰渴
何忍甘人虎豹饑天變易將妻子代民心難得弟兄歸
可憐阿法重延喘不死長生死苟妃

漢宣帝

蓮勺輕遊興未酣內庭軫獵趣飛驂鯨鯢組繫單于五
龍鳥符垂寶曆三大業休歌問牛後私恩自指鬪雞南
如何故劔搜求已芒刺侵人不復械

黃鸞

會真堂集 卷二
絲蠻句調笙簧舌覘眈丰容金縷衣逢樹有陰還一曲
移枝不遠亦雙飛故將俗耳求良砒自可旋聞發妙機
燕子家人鵲鳩野固須公子暫相依

聞鷓

飛來覘眈兩黃鷓新霽明陰綠樹齊知恨一春愁濕過
欲消半日盡情啼野園脩竹應過慣斗酒雙柑不用攜
老耳未聾無處著強將清弄洗聞聲

竹下卽事

新秋溽暑未期闌竹下琴樽陰翠寒風裏芰荷香散遠

月邊秔稻露昇端螢啼落葉經心聽螢坐攤書試眼看
日暮西隣村社散隻雞先致老夫膳

田舍

方茅晴翠撲村墟丘首終憐蝸燕居隣里舊通鶩鴨徑
田園新納馬牛租管寧已老仍穿榻范粲雖存不下車
安得南溟近消息長陵松柏半凋疎

重陽

不出柴門又幾旬登丘籬角應佳辰江楓墮紫霜前細
山木凝蒼雨後新菊盞可禁蓬鬢改南冠無奈北風頻

會真堂集 卷二 七言律
若非谿淖妨來屐門外能無載酒人

雨後

上元裁過春暄早忽作淒風苦雨涼壓屋一堆梅雪艷
橫林千丈檜雲蒼葭牆篝火愁邊影瓶水花枝醉裏香
客去甕乾那敢惜蓬蒿難得有求羊

惻惻

亂來那得生民術老去慙無及物慈鉏菜憐開蟲戶瑾
爲薪忍拾鵲巢遺梅飛細雨孤村暗萍約斜風半沼漪
自笑剗心老無力長將惻惻付深卮

落花

迴風欲墮故依依散點苔紋宿雨滋歸本復移隨燕嘴
別枝猶繫賴蛛絲漢宮被掩嬌時面洛水霞明去後姿
我自長年傷葉落一時啼鳥爲誰悲

月夜

月明似晝風林靜雨過如秋草閣涼摩詰燈前蟲響促
湖洲畫裏竹陰長夏初已餉青精飯夜久還燒白法香
若向情塵脩覺路好從鏡背覓清光

日暮

門界斜林靄夕暉
掠生羣燕剪烟飛
稻畦遠際晴山翠
漲水平吞矮樹圍
斷岸蘆花疑雁至
連村砧響竟蟬稀
可憐負米勞勞者
日暮瓶中得酒歸

月夜泛天河偶成

沿堤十里樹依依
恍是乘槎渡紫微
舟入大荒人意遠
雲移曲境世情稀
陰陰紫氣烟如織
淡淡波光綠著衣
歸去莫嫌羅襖濕
棲鴉似帶曉暉飛

爲孺孝賦白雁

萬里湖天一雁飛
翩翩玉宇墮清輝
上林此去音書杳

北海虛傳屬國歸
秋水影分霜翮健
寒汀聲落月華微
雲霄怪底飛來疾
聞說江南黍稻肥

丁卯奉使入蜀宿安山驛懷華陽居士

笑啼從不向人前
仗劍相看二十年
媿我冰心於世熱
嘆君詩骨以貧堅
秦山層疊遲初月
蜀道巒岈失遠天
夜半燈前無限事
令人遙憶玉門泉

登峨眉絕頂

蜿蜒西來此獨巍
冲玄直上勢如飛
諸峰極處方爲麓
萬象迷時偏有暉
天倒星垂燈隱現
月低江小影依稀

雪因寒老頭盈白俯瞰寰中一氣微

贈孺孝先生湖上

湖上幽偏花信遲懶同時輩較妍媸胸中冰炭由來少
世上風波總不知踪跡漫隨鷗鷺慣襟期直與水雲宜
嚴灘本是逃名處好占雙楸舊釣坻

巳卯夏謁邳州蘇念翁使君信宿羊山寺有感

寤寐伊人水一方遡流千里爲觀光羊山半榻邀明月
野渡扁舟列遠檣昔見湯湯瀾寺北頃驚濺濺逝山陽
令人不盡滄桑感擽醉中山酒一觴

與友登覽勝臺

乘興同登覽勝臺遙傳仙客飲霞杯孤帆縹緲隨雲去
佳氣氤氳逐面來好鳥枝頭亦吾友繁花溪畔向誰開
歸來興盡天風發襟袂孤吹別有懷

瞻孔碑弔始祖志感

蓋世英賢惟盡倫潛銷內難獨吾君巍巍千乘歸身有
邈邈孤忠應亦深樂興衰聊露穎劒盟生死亦餘情誰
誰知麟筆無窮意萬古悠悠啟後人

和秦鈺五十初度

荒湖萬頃浸長天中有銅坻隱大仙不起妄心營世務
只培元氣養天年芳名曾列經生籍遺世甘爲處士緣
苦海霎時登彼岸碧空無際一輪圓

坐上宮道房有感

瑤堂正對大茅峰一日閒行萬慮空青鳥夜歸玄圃月
碧桃春綻玉臺風上方樓觀天應近古洞蓬萊路或通
便欲尋仙還自笑夕陽芳草茂林中

登煙雨樓

在樵李

水樹迷離蔽遠空昆明鑿漢古今同崔巍勢攬空濛結

覆壓陰連灑瀨濃無數曉蟲花簌簌幾多漁笠草叢叢
斜陽暗落千家火月盡珠來渺冥中

謝王石鯨惠四太史刻西蜀英多

太白經天蜀國霽燼餘文獻俟書淫東陽紫氣輝東壁
錦水清波濯錦心四瀆源流皆旣道三巴桃李盡成陰
旅愁華髮依天社西笑聊爲漢上衿

壽陳鹿萃初度時長至

亞歲辰升慶履長星輝南極正寒芒捫參歷井涵三象
澍雨飛霜壽八荒江漢源深流不竭岡陵啓運積無疆

會真堂集 卷二十一 詩
况當明聖昇平世野祝朝賡樂未央

寒宵卽事

一 分開夜色闌驚拋歸夢覺衣單城迷烟火風雲合
月照霜華星斗寒戰筆千竿藏武庫題書萬卷起文瀾
臯比座擁龍蛇陣採取驪珠掌上看

遣家屬之任

支離病骨逐風塵一片愁滌南北身霜雨乍屯應念爾
晨昏莫定豈爲人簡書罔畏山河動親舍如遙雲樹隣
此地并州明日去歸程客路總傷神

春二月按部鹿泉憂旱兼值寇警題省院壁

寇盜頻年家室傾蕭條四野少人耕遺黎正切甘霖望
旱魃偏憑殺氣橫細雨隨車差有意狂氛接地恁無情
倩渠挽得天河水半灑桑麻半洗兵

秋大熟過鹿泉籌邊

春時憂旱若無民輦鼓秋高又震鄰匹馬嘶風禾黍熟
陣雲壓塞戍營屯篝車十稔今纔滿囊橐三關磬已頻
壯士盤餐辛苦粒爲霖相望淨邊塵

五言絕句

秋蟲

徹夜聲難譯悲秋意可知那禁漢女淚若誦楚臣辭

輕雨

輕雨洗朝晴江干雲水清樹疎山色映花落石均平

有情

桃花得意紅楊柳傷心碧同在春風中有情不相識

曉望茅山積雪

平野眺新晴三峰積雪明白雲壓地重飛瀑駕雲橫

茅峰看積雪

故遶姜巴路山陰雪未消幽人定來往逋客不須招
月夜舟過鄧纓州銅馬三首

潮漲水圍天烟村雲未間微茫不可渡帆影逗蘆灣
波心隱者居白雲覆銅馬近聞更逃名亂樹深雲下
洮湖明月影處處罾魚聲何處釣磯上羊裘老客星

遊牛首山雜詠

銀杏

黃葉已滿地樹頭殊未稀祇應遊客去細細滴斜暉

仙竈

傳是神仙造山僧跪進薪本求機事便此子自辛勤

塔影

明峰俯映塔一隙光華翕譬如繡衣人仰鏡影倒立
辟支佛塔

凌雲臺

一身此已足何況乃無身半龕收夕照萬壑起秋燐
窻中一局棋未盡金爐炭新月和斜暉紫翠諸峰變
獻花巖絕頂

會真堂集 卷二
高峰不復遮萬里澄江巨勝境百慮忘嗟爲境所勝

懶融洞

天窗草色搖鳥影時時墜何時至人來更滅此佛字

中夜作

光明冰上雪皎潔霜前月對此不眠人經旬斷薇蕨

同行

同行四五舟前後常錯落相過舉手招風利不得泊

湘江絕句七首

水淨秋逾綠峯晴晚更蒼幸逢搖落小不厭泝洄長

隱見隔洲帆洲盡復相見托賴一家風欲速不敢先

盤崖側入水上掛秋蘿葉老翁四五人垂綸坐殘日

湘岸有時平平時幾十里隔江盡峰巒亦復無平地

曉雲生一谷皚皚何轟轟隨風側上天五斗炊初熟

兩艇或一帆一人或兩槳遊戲作操舟惟有湘江上

萬里空江夜相宜未稱情蘇卿數聲雁煬帝一囊螢

楚地

雁到遲又無螢火

壓酒

壓酒今朝了還能更釀無蕭條娛老計尚得半年需

生菜

生菜春生時終日被採擷老來惟一幹結子苦無葉

老言絕句

七夕七首

仙家日月自從容何事長違博暫逢總教三萬六千歲
纔與人間百歲同

玉河明滅瀉清虛露久凌波襪半濡若乞巧絲酬鵲架

也將何物答蜘蛛

義山云可能無意酬鳥鵲惟與蜘蛛乞巧絲

河畔奇雲似白麟仙旗疑是復沉沉乘槎欲向天邊問
可有支機石贈人

天上佳期可是真金風玉露也愁人曝書松壑烟棲笥

穿錦花陰月透針

天清星宿半浮沉
龍駕雲旛見碧陰
誰知織女相逢夜
又是王喬離別晨

機杼終宵定幾襄
五銖含霧渡河梁
天上也應聞促織
秋衣連夜送牛郎

遙見扶桑白似銀
霓裳烟佩去逡巡
正似人間歡會夢
曉來依舊是商參

夜泊虎丘

孤舟夜就青山宿
露颯高林蟲亂吟
生老不言聆石語

真娘欲舞入花陰

晴夜

藤樊四遶接懸星
寂寂稠陰亂落螢
月滿莓苔分鶴跡
雨餘草樹帶龍腥

金山

天淨江空兩鏡交
中流樓觀鬱嶢嶢
魚龍秋影眠窻戶
草木寒聲挾汐潮

丹陽道中

共醉朱方古驛邊
月明酒醒却分船
東西各自乘潮去

會真堂集 卷二
獨叩僧扉借榻眠

秋夜

四隣寂寞若爲朋
把酒沉吟盡一燈
打草登登聞織屨
却疑村塢有於陵

曉行湖上

曠曠旭日煖難迴
霜雪連宵七澤埋
賴有漁舟往來疾
湖水留得一絲開

落梅花三首

新年和雪葬王嬙
痛惜臨埋玉體香
好贈遊姬人五瓣

有情都作壽陽粧

向秀山陽感夕吹
未知何曲動深悲
如今親見精英萎
曉得當年笛裏詞

月殿霞帷寶鼎開
上真親降許追陪
一從星散雲消後
始賴芳魂入夢來

初夏

草銜孕鯽翻銀白
杏啄饑禽墮蠟黃
心織漸拋人已老
手談未覺日初長

夜行

雙豕崢嶸喧榭葉一灣昏黑爛漁燈過橋有恨聞鐘盡
歸路無端背月行

寒露日於墓次見丹楓

白露寒來八月中夕陽喬木迴吟風不應墓樹逢霜早
已著楓枝數葉紅

撫州蚤發

石岸松聲曉色開蘭橈欲發鼓笳催窻浮匡嶺晴烟迴
帆濕江州夜雨來

衡水道中

十步常逢五步雨萬峯時有一峰晴瘴來祇益篁陰綠
澗響懸知水底清

永州留別同鄉諸子

尚說衡州有會期此身無定亦難知與君俱是江南客
只計家鄉酒一卮

山行絕句

縱橫畝壑皆侵麓紅白花開各占山晴極喬林看減翠
漲來小澗變流丹

江上絕句

羣鷗刷浪鷺眠洲江色都將潔白收便有金衣雙舞蝶
奪他空迴一江秋

九月朔日宿湖口

湘陰城下風全利及到湖邊却又休自信烟波有緣分
將過仍得一宵留

德州道中楊柳

百里村堤一種楊風煙欲變未經霜可憐無限傷心葉
盡作江南二月黃

曉雨

馬足車輪土迷人藍輿簾幙閉深深侵晨灑道逢佳雨
一洗朱黃樹出塵

舟過清河閘

淮水寬平河水雄爭驅並束一門中任他兩岸黃蛟怒
人在清流帆滿風

山陰公主

金柄琵琶語未通月斜西閣五更鐘休矜容止當朝絕
自有均平小褚公

褚淵

顧托崇階柱石軀也將嫵媚鬪時趨山陰公主齊書竟
如戟鬚髯不丈夫

范曄

九重歌闋歇檀槽負謗懷恩骨可銷最惜丹青空代手
死時啼笑被人描

徐廣

枉殺曾孫掩面羞元臣空抱杞人憂誰知鼎祚推難去
却使徐公淚再流

魏宮

□□每過燕支哭胡婦千秋怨茂陵更有餘謀誤癡□
後宮愁死詛前星

溧陽公主

肉搵濃鹽進跛奴闍黎親示誌公符不知窈窕羊家女
也近千刀禁鬻無

首二事見侯景傳景又納羊
侃女為小妻見侃傳侃音侃

石閔

稍報胡人殺晉人休疑天地太無情自從漢戮諸闍後
有鬣無鬚事始平

費長房

神仙自待身修煉符效傳方卽用之正是高官無德政
解章旋被小民欺

宋公

官貴金吾百倍疆中宮安可失陰娘宋公田舍無收麥
只解糟糠不下堂

秋日雨中見黃榴花一朵

客思秋來不自將秋花無處不堪傷可憐秋盡伶俜朶
雨後孤開帶葉黃

園栗二絕

未蒸擬玉黃猶嫩蚤落經風味已饒分賜兒童筐欲罄
幾拳留得薦新醪

已憐破殼桂花香更愛鵝兒酒色黃爲問樹頭還有幾

開園待與杜陵嘗

杜詩嘗果
栗園開

寒食

積雨泥塗妨上冢殘花惆悵且銜盃百年計日還盈萬
莫怕盈頭霜雪催

黃狸

黃狸到處嫌偷食不到還憎鼠跡交猶勝太平中外吏

長無取但貪饗

青蒿帚

烟垂寶鏡青鸞尾風拂兩潭兩竹梢閒倚畫欄無所用
空庭桂子落蕭蕭

小樹

萬壑千林始變蒼窻前小樹獨先黃誰管窻中長年客
驚心搖落最悲傷

桂花二絕句

春花不及秋花久黃菊紅薇積月榮誰似幽窻小叢桂

一秋香發兩三層

堦前叢矮青猊臥月裏香濃玉兔春騷人招飲消何物
秋釀繁花葉燠冬

金線柳

孤莖鶴膝垂青翼寶葢腥紅綴畫竿名柳正緣同有線
霜中火爛柳奚堪

移梅

老梅半死枉义牙移得還開四五花却似鮫人變形去
淚珠遺粒灑騰拏

會真堂集 卷二
桃源圖步韻之作

峭壁攢峰千萬重
仙宮有路豈難通
漁郎指點津頭去
回首殘花滿地紅

鵲嘲

汝名喜鵲常如喜
惟我愁心無絕時
待欲將心化爲汝
汝愁我化有誰知

華陽洞

古洞陰陰石壁高
坐聽仙侶奏雲璈
神仙草莽今陳迹
空憶吹笙醉碧桃

秋日寇警赴關重經鹿泉不見壁間句有感

詩成憂旱應甘霖
禾黍秋風動客心
殘藩欲留牆粉妬
重來何必又相尋

齋居祝雪

冰心作雪擁蕭齋
一片寒氈倚凍崖
忽被回風掀入幕
依然紅日晃前階

聞變誓死口占一絕

夷齊死後人倫在
逢比生前吾道窮
誰誤蒼生傾社稷
到今惟有訴蒼穹

朝陽洞未成句

江急絕無來去地山圍却有剪裁天洞流日湧四川水

居人云洞通蜀中石宇時飛一滴泉

齋居時書

重來何必又休幹

病如憂旱飄甘霖未乘煉風陣容小幾番燈留辭餘

煉日銀蟾怯關重豈與泉不見壑間何首憑

